

**Ilinniarnertuunngorniartarfinni ilinniartitsinissamut piginnaaneqarneq pillugu
Namminersorlutik Oqartussat nalunaarutaat nr. 18, 17. september 2015-imeersoq
(pædagogikum pillugu nalunaarut)**

Ilinniarnertuunngorniartarfinni pillugu Inatsisartut inatsisaat nr. 13, 22. november 2011-meersumi § 57, imm. 2 aamma 3, Inatsisartut inatsisaatigut nr. 4, 30. maj 2014-imeersukkut allangortinneqartoq, tunngavigalugu aalajangerneqarpoq:

Kapitali 1

Nassuiaatit

§ 1. Pædagogikummi ilinniartuq paasineqassaaq tassaasoq, ilinniartitsisoq pædagogikummi aallartitsisimasoq, sulili naammassinngitsaq.

§ 2. Ilinniartitsissummi ilinniartitsinissamut piginnaaneqarneq paasineqassaaq tassaasoq, ilinniarnertuunngorniartarfinni ilinniartitsissummi ilinniartitsinissamut piunasaqaataasumik piginnaaneqarneq, taamaattoq tak. §§-it 26 aamma 42.

Imm. 2. Ilinniartitsissummi ilinniartitsinissamut piginnaaneqarnermut ilaapput ilinniartitsissuttip qaffasissusai tamarmik,

Imm. 3. Ilinniartitsissummi ilinniartitsinissamut piginnaaneqarnermut ilaapput ilinniartitsissummut tunngasutigut piginnaaneqarneq aamma pædagogikkimik piginnaaneqarneq.

§ 3. Ilinniartitsissummut tunngasutigut piginnaaneqarneq paasineqassaaq tassaasoq, ilinniarnertuunngorniartarfinni ilinniartitsissummi ilinniartitsinissamut pisariaqartumik ilinniakkatigut aamma misilittagaajunnartutigut tunuliaqutaqarneq, tak. kapitali 5.

Imm. 2. Ilinniartitsissummut tunngasutigut pisariaqartumik tunuliaqutaqarnissaq, ilanngussaq 2-mi ilinniartitsissummut tunngasutigut piunasaqaatit annikinnerpaaffissaattut allaaserineqarpoq.

§ 4. Ilinniartitsissummi pædagogikkimik piginnaaneqarneq paasineqassaaq tassaasoq ilinniarnertuunngorniartarfinni ilinniartitsinissamut pisariaqartumik teoretiskimik, ulluinnarni suliatigut aamma ilinniartitsissummut atatillugu ilinniartitseriaatsitigut ilinniagaqarsimassutsikkullu tunuliaqutaqarneq.

Imm. 2. Pædagogikkimik piginnaaneqarneq angussagaanni pædagogikum naammassillugu ingerlassimasariaqarpoq, tak. kapitali 2-4.

§ 5. Teoretiskiusumik pædagogikkimik pikkorissarneq paasineqassaaq tassaasoq, pædagogikkimik nalinginnaasumik aamma oqaatsit ilinniartut ilitsoqqusarinngisaat atorlugit ilinniartitsinermik pikkorissarneq imaluunniit pikkorissarnerit arlaqartut aamma ilinniartitsissumi ilinniartitseriaatsit, ilinniartitsisunngorlaanut pikkorissarnerit, tak. § 6 imaluunniit ilinniartitsissummi ilinniartitseriaatsinik

pikkorissarneq ataaseq arlaqartulluunniit, tak § 7.

Imm. 2. Pikkorissarnerit imm. 1-imi taaneqartut tamakkerlugit ilaannakortumilluunniit qarasaasiakkut ingerlanneqarsinnaapput.

§ 6. Ilinniartitsisunngorlaanik pikkorissaaneq paasineqassaaq tassaasoq, ilinniarnertuunngorniarfinni ilinniartitsisunut atorfinerlaanut immikkut ittumik aaqjissuussamik pikkorissaaneq.

§ 7. Ilinniartitsissummi ilinniartitseriaatsinik pikkorissarneq paasineqassaaq tassaasoq, ilinniartitsinermi periutsinik pædagogikkimillu ilinniartitsissutip ilisarnaqutigisaanik atuilluni, ilinniartitsissummi aalajangersimasumi pilersaarusionermik ingerlatsinermillu pikkorissarneq.

§ 8. Ulluinnarni sulinermut tunngasunik pædagogikummi paasineqassaaq tassaasoq, pædagogikummi ilinniartup ilitsersorneqarluni siunersioneqarlunilu atuartitsineratut, tassunga ilaalluni nakkutilliisup pulaarnera aammalu allat atuartitsinerinik nakkutilliinera.

Kapitali 2

Pædagogikummi siunertaa anguniagaalu

§ 9. Pædagogikummi siunertaa tassaavoq, qulakkiissallugu ilinniarnertuunngorniarfinni ilinniartitsisut ilinniartitsinermi pisariaqartumik pædagogikkimik aamma ilinniartitsissummi ilinniartitseriaatsinik piginnaaneqarnissaat aamma ilinniartitsisut ilinniakkap ineriartortinneqarnerani taamatullu ilinniakkap inuiaqatigiillu avatangiiserisat imminnut sunneqatigiiffisigut peqataanissaannut tunngaviliinissaq.

Imm. 2.

Ilinniartitsisunik atorfinerlaanik pikkorissartitsisarnerup siunertaa immikkuullarissumik tassaavoq, ilinniartitsisup pissutsinik ilinniarnertuunngorniarfimmi ilinniartitsinermit ilisarnaataasunik ilisimasaqalernissaa, tassunga ilanngullugit inuiaqatigiinnut kalaallinut tunngasut, kalaallit kulturiat, ilinniartut ilisimasamik, oqaatsitigut aamma inooqatigiissutsikkut tunngavii, ilinniakkamut atatillugu malittarisassat atuuttut taakkualu tunngavii aamma ilinniartut ilitsoqqussaralugu oqaaserinngisaat atorlugit ilinniartitsineq.

§ 10. Pædagogikummi anguniagarai, ilinniartitsisup piginnaasaqarfigissagai:

- 1) nammineq pilersaarusionaatsip, ilinniartitseriaatsip nalileeriaatsillu aamma teoretiskimik pædagogikkimillu tunngasunut attaveqarfiisa eqqarsaatiginissai,
- 2) eqqarsaatersornermut tunuliaquttatut pædagogik nalinginnaasoq ilinniartitsissutinilu ilinniartitseriaatsit pillugit ilisimasat akuleriisinnissaat,
- 3) nammineq ilinniartitsissutigisani ilinniartitsissutitigullu ingerlatseqatigiiffinni ilinniartitseriaatsitigut periarfissat ilisimanerannik takutitsineq,

- 4) sammisassat ilinniarnertuunngorniarfinnut attuumassuteqartut ilisimanerisa takutinnissaat,
- 5) ilinniartitsisutut sulinermi aamma ilinniarnertuunngorniarfiup demokratii tunngavigalugu ingerlatsiffiini, ilinniakkami malittarisassanik atuinissaq,
- 6) ilinniartitsissutini ilinniartitsissummut tunngasutigut pædagogikkikkullu inerisaalluni ingerlatsinernut peqataaneq, taamatullu ilinniarnertuunngorniarfiup ataatsimut sammisartagaanut aaqqissugaanerannullu naleqqiullugu,
- 7) ilinniartitsinermi atortussat, IT, av-mi atortut, laboratoriat naapertuuttut aamma sulliviit avammullu sammititamik ingerlatsinerit atorlugit ilinniartitsinermik namminersorluni pilersaarusioneq, ingerlatsineq naliliinerlu,
- 8) ilinniartitsissummi ilinniartitseriaatsitigut tunngaviit aamma ilinniartitsinermik sulinermilu ilusileeriaatsit assigiinngitsut atornissaat, tamatumunnga ilanngullugit suleriaatsit, ilinniartitsissutunik ataqatigiiffinnut piviusunut qanittunut attuumassuteqalersitsisut,
- 9) ilinniartut ilitsoqqussarinagu oqaasiinik ilinniartitsinermi pædagogikkipp qanoq pisariaqartinneqartigineramik atornissaanillu naliliineq,
- 10) nammineq, allat atuarfiullu atugassaanik ilinniartitsinerup inerisarnera eqqarsaatigeqqinneralu,
- 11) pædagogikummi sammisassanik Kalaallit Nunaanni pissutsinut naleqqiussisunik toqqartuineq atuiinerlu,
- 12) ilinniartut assigiinngitsut ilinniartitsinermut naleqqiullugu piginnaasaasa ilimagisassallu paasiniarnerat taakkunangalu naleqqussaaneq,
- 13) ilinniartut ilinniariaasiisa assigiinngitsut ikorfartornissaat,
- 14) ilinniartut suleqatigalugit ilinniartitsissutini suliaqarnissamik pilersaarusioneq, tassunga ilanngullugu klassip inaata toqqissisimanartuullunilu peqataatitsiffiulluartumik kultureqalernissaanut inerisaaqataaneq,
- 15) ilinniartut nalileeriaatsinut misilitsinnermilu periaatsinut assigiinngitsunut piareersarnerat,
- 16) ilitseruilluni kaammattuutaasumillu siunnersuilluni ingerlatsinernut peqataaneq,
- 17) immikkut ikorfartuutaasumik sammisassanik ingerlatsinissanillu pilersaarusionernut taakkunangalu ingerlatsinernut peqataaneq,
- 18) ilinniartitsissutini ataasiakkaani ilinniartitsissutillu akimorlugit ilinniartitsineq pillugu ilinniartitsisut allat suleqatiginerannut peqataaneq, tassuunakkut ilaatigut ilinniartitsissutit imminnut sunneqatigiinnissaat, ataqatigiissuseq ilinniartitsinerullu siumukartuarnissaa pilersinneqaqqullugit,
- 19) ilinniarnertuunngorniarfiup avataani aaqqissuussaangitsumik ilikkariatortarnek pillugu paasinnissimanermik takutitsineq,
- 20) meeqqat atuarfianni pædagogikkikkut periutsinik atorneqartunik paasinnissimanermik takutitsineq aamma
- 21) suliffeqarfinnut avataaniittunut, kattuffinnut kiisalu najukkami inuussutissarsiortunik suleqatigiinnissamut periarfissanik paasinnissimanermik takutitsineq.

Kapitali 3

Pædagogikummi ilinnialersinnaaneq

§ 11. Pædagogikummi ilinnialernissamut piumasaavoq, ilinniarnertuunngorniarfimmi rektorip

ilinniartitsissummi piginnaasamik pineqartumut tunniussaqaarsimanissaa, tak. kap. 5. Aammattaaq piumasqaataavoq pineqartoq ilinniarnertuunngorniarfimmi aalajangersimasumik atorfininnissaq siunertaralugu atorfinitsinneqarsimassasoq.

Imm. 2. Ilinniarnertuunngorniarfimmi ilinniartitsisutut atorfinitsinneqarnerup siulliup aallartinnerani, ilinniarnertuunngorniarfiup erngeluni pædagogikumimik ilinniartoq Ilinniartitaanermut Naalakkersuisoqarfimmut nalunaarutigissavaa.

Kapitali 4

Pædagogikumip ilusaa, pilersaarusiornera imarisaalu

§ 12. Pædagogikum tassaavoq ilinniartitsisunut atorfinerlaanut ilinniagaq pædagogiskiusoq.

Imm. 2. Ilinniarneq paarlakaattumik ingerlasussatut aaqqissuussaavoq, teoretiskiusumik immikkoortortaqluni, tassunga ilaalluni ilinniartitsisut atorfinerlaat pikkorissarnerat, aamma ilinniartitsissutip ilinniartitsissutiginnisaanik pikkorissarnerit, kiisalu immikkoortoq tigussaasumik suliaqarnermut tunngasoq ilinniarnertuunngorniarfimmi klassini ilinniartitsinermik ilaqartoq.

Imm. 3. Pædagogikumip immikkoortui ataasiakkaat aaqqissuunneqassapput imminnut tapertariittussanngorlugit.

§ 13. Pædagogikum ilinniartitsissummi ataatsimi marlunniluunniit ingerlanneqassaaq. Ulluinnarni pissutsit tamanna ajornartinnigippassuk Ilinniartitaanermut Naalakkersuisoqarfiup akuersissutigisinnaavaa pædagogikumip ilinniartitsissutini marlunnik amerlanerusuni ingerlanneqarnissaa.

Imm. 2. Pædagogikum naammassineqarsimassaaq ilinniarnertuunngorniarfimmi aalajangersimasumik atorfinitsitaanermut ukiut siulliit marluk ingerlaneranni. Rektorip, inuttut atukkat immikkut ittut, imaluunniit ilinniarsiup pisariaqartitaasa immikkut isumassornissaasa tamanna tapersorneqarsinnaatippassuk, qaqutigunnaq akuersissutigisinnaavaa, pædagogikumip ilinniarnertuunngorniarfimmi atorfinitsinneqarnerup siulliup kingorna ukiut pingasut tikillugit kinguartinneqarnissaa.

§ 14. Pædagogikum ataatsimut katillugu ukiumik ataatsimik sivisussuseqarpoq, sammisassanillu makkunanga ilaqarluni:

- 1) Teoretiskimik pædagogikum, tak. § 5.
- 2) Teoretiskimik pædagogikumimi misilitsinneq.
- 3) Suliamut atatillugu pædagogikum.
- 4) Nammineq ilinniartitsineq, naliliinissamik soraarummeersitsinissamillu piareersarneq taakkunungalugu peqataaneq.
- 5) Iltersuisumik, pikkorissartitsinermi aqutsisumik aamma nakkutilliisumik suleqateqarneq aammalu ilinniarfimmi ataatsimiinnerit kiisalu isumasioqatigiinnerit, malinnaaneq aamma kaammattuutaasumik siunnersuineq.

Imm. 2. Ilinniartitsisunngorlaanik pikkorissartitsineq, tak. § 6. aamma kaammattuutaasumik siunnersuineq aallartinneqassapput ukiumi atuarfiusumi siullermi. Sammisat sinneri nalinginnaasumik aallartinneqassapput ukiut atuarfiusut aappaata aallartinneqarnerani. Taamaattoq ilinniarsiup

ingerlatsineq allatut ittumik aaqqissuussinnaavaa, ulluinnarni pissutsit tamanna ajornartinnigippassuk.

Imm. 3. Pædagogikum inuup ataatsip ukiumi ataatsimi suliarisinnaasaanut naatsorsorlugu nalunaaquttap akunnerinik 60 minutsikkaartunik 1784-inik sivisussuseqarpoq. Sammisassat pædagogikummut ilaasut piffissamut atugassamut agguaaneri ilanngussami 1-imi takuneqarsinnaapput.

§ 15. Ilinniarnertuunngorniarfiup akisussaaffigaa, pædagogikummit ilinniartup pædagogikummit ingerlatsinerata siunertamut naapertuuttumik, tak. § 9, pædagogikummit ilinniartup anguniagassat allassimasunik, tak. § 10, angusisinnaanngorlugu aaqqissuunneqarnissaa.

Imm. 2. Ilinniarnertuunngorniarfiup suliarissavaa pædagogikummit suliaartai pillugit pilersaarut qularnaassallugulu pædagogikummit ilinniartup siunertamut naapertuuttumik suliffimmi atugassaqaarnissaa.

Imm. 3. Pædagogikummit sulinermit immikkoortortaa, malittarisassat pingaarnertut inissinneqartassaaq piffissami pædagogikummit ilinniartup suliffissaatut akuerisaasup iluani.

Teoretiskimik pædagogikum

§ 16. Teoretiskimik pædagogikummit ilinniartitsinermit qitiusumik ilinniagassat makku ilaapput:

- 1) Ilikkariartortarneq pillugu teoriit, ilikkariartornermi pisartut ilinniartitsisutullu pissusilersuutit.
- 2) Ilinniartitsinermit, sulinermit naliliinermillu ilusileeriaatsit, tassunga ilaallutik oqaatsit ilinniartut ilitsoqqusarinngisaat atorlugit ilinniartitsineq aamma ilinniartitsineq kulturimik aallaaveqartoq.
- 3) Attaveqatigiittarneq pillugu teoriit aamma suleqatigeeriaatsit, ilanngullugu kulturit akimorlugit ilikkariartortarneq.
- 4) Nammineq ilinniartitsissutigisani tunngaviusumik ilinniartitseriaatsit nalileeriaatsillu, nammineq ilinniartitsissutigisani ileqqut, malittarisassatigut tunngaviit aammalu suleriaatsit, ilinniakkat sammiviini assigiinngitsuni immikkut ilisarnaqutaasunut naleqqiullugit.
- 5) Ilinniartitsissutip, immikkoortup pingaarnertup iluani ilinniartitsissutinut allanut ilinniartitsinermit periutsitigut ataatsimoorfii, aamma immikkoortuni naapertuuttuni immikkoortullu pingaarnertup akimorlugit ilinniartitsissutit imminnut attuumassuteqarfii.
- 6) Ilinniarnertuunngorniarfinni tunngaviusumik aaqqissuussaannikkut ilisarnaatit taakkulu inuiaqatigiinnut avatangiiserisanut attuumassuteqarfii.

Imm. 2. Qitiusumik ilinniagassat itisilerneqassapput paasiuminarsarneqarlutillu ilassutaasumik ilinniagassanik, makkuusinnaasunik:

- 1) Ilinniartitsinermit ilisimatusarneq maanna ingerlanneqartoq, pingaartumik pissutsit Kalaallit Nunaannut immikkut pingaaruteqartut pillugit.
- 2) Ilinniartitsineq pillugu politikkikkut apeqqutit ullutsinni sammineqartut.
- 3) Ilinniartut ulluinnarni ilinniartitsinerannit immikkuualuttut.

§ 17. Teoretiskimik pædagogikummut ilaavoq, piffissani Ilinniartitaanermut Naalackersuisoqarfiup aalajangigaani, pædagogikummit ilinniartup ilinniartitsissutigisartagaani ilinniartitseriaatsit pillugit ilassutaasumik pikkorissarneq.

§ 18. Teoretiskimik pædagogikumimik ilinniartitsineq ilisimatusarfimmi Ilinniartitaanermut Naalackersuisoqarfimmit ingerlatsinissamut akuerisaasumit, ingerlanneqassaaq, taamaattoq tak. imm. 2.

Imm. 2. Ilinniartitaanermut Naalackersuisoqarfiup imaluunniit pikkorissaasut pikkorissaasulluunniit arlaqartut Naalackersuisoqarfiup toqqagaata, ilinniartitsisunngorlaanik pikkorissaaneq ingerlatissavaat.

§ 19. Ilisimatusarfiup, teoretiskimik pædagogikumimik ingerlatsisussatut toqqagaasimasup, tak. § 18, imm. 1, teoretiskimik pædagogikumip ilinniakkatut aaqqissugaanera - ilinniartitsisunngorlaanik pikkorissaaneq kisiat pinnagu - aalajangersassavaa.

Imm. 2. Ilinniakkap aaqqissugaaneranut ilaassapput, sammisassat teoretiskimik pædagogikumimut ilaasussat pilersaarutaat, tamatumunnga ilanngullugit pikkorissartitsinerit taakkualu qaammatisiutit malillugit inissinneqarfissaat, aamma nammineerluni najuunnissaq pillugu piumasaqaataajunnartut, piareersarnissamik suliallu tunniunneqarnissaannik piumasaqaatit.

Imm. 3. Ilinniakkap aaqqissugaanera Ilinniartitaanermut Naalackersuisoqarfimmit akuersissutigineqassaaq.

Teoretisk pædagogikumimi misilitsinneq.

§ 20. Pædagogikumimik ilinniartoq, pikkorissarnerit tamarmik, tamatumunnga ilanngullugu ilinniartitsissummi ilinniartitseriaatsinik pikkorissarneq, naammassippatta, teoretisk pædagogikum naggaserlugu sapaatip-akunneranik ataatsimik sivisussusilimmik misilitsissaaq.

Imm. 2. Taamaattoq rektorip akuersissutigisinnaavaa misilitsittoqassasoq, allanngortinneqarsinnaanngitsumik tigussaasunik peqquteqarluni, pædagogikumip ingerlanissaatut pilersaarutaasut naapertorlugit pikkorissarnerit immikkuualuttortaat ataasiakkaat, naammassineqarsimannikkaluarpataluunniit, pædagogikumimik ilinniartup nammineq ilinniarnermigut imaluunniit kingusinnerusukkut ilassutaasumik ilinniartinneqarnermigut anguniakkat § 10-mi aalajangersarneqartut anguppagit.

§ 21. Misilitsinneq allattariarsorneruvoq aammalu Ilinniartitaanermut Naalackersuisoqarfimmit suliassiissutigineqartarluni soraarummeerutissaliornermut ataatsimiititaliap innersuussereerneratigut, tak. § 22.

Imm. 2. Misilitsinnermi teori suliamullu tunngasut akuleriisinneqassapput, aamma nalinginnaasumik pædagogikkimut ilinniartitsissummilu ilinniartitseriaatsinut tunngasunik ilaqassalluni, ilutigisaanillu piumasaavoq pædagogikumimik ilinniartup akissuteqarnermini nammineq ilinniartitsinermini suleriaatsiminik misilittakkaminillu ilaatitsinissaa.

Imm. 3. Misilitsinneq ilinniarnertuunngorniarfimmi pædagogikumimik ilinniartup suliffiani pissaaq, ukiullu atuarfiusup naalernerani sapaatip-akunnerani ataatsimi itatigiissumik ingerlanneqassalluni.

§ 22. Ilinniartitaanermut Naalackersuisoqarfiup soraarummeerutissaliornermut ataatsimiititaliaq pilersissavaa, imaluunniit soraarummeerutissaliornermut ataatsimiititaliaq, ilisimatusarfimmit, danskit

ilinniartitaanermut ministerianit Danmarkimi teoretisk pædagogikummimik ingerlatsinissamut akuerisaasumit akuerineqarsimasoq, suleqatigissallugu.

Imm. 2. Ataatsimiititaliap teoretisk pædagogikummimi suliaqsiissutissamut siunnersuut suliarissavaa, siunnersuullu Ilinniartitaanermut Naalackersuisoqarfimmit akuersissutigineqassalluni.

§ 23. Misilitsinnermi akissut soraarummeernermi naliliisunik marlunnik Ilinniartitaanermut Naalackersuisoqarfimmit toqqarneqarsimasunik naliliiffigineqassaaq, taakkua peqatigiillutik Greenlandic Grading System skala malillugu karakteriliissapput.

Imm. 2. Naliliinerup ersersissavaa pædagogikummimik ilinniartup teoretisk pædagogikummimi anguniakkat qanoq annertutigisumik naammassisimanerai, tassanilu pingaartillugit isiginiarneqassapput pædagogikummimik ilinniartup makkunuuna piginnaasai:

1) nalinginnaasumik pædagogikkimi ilinniartitsissumilu inniartitseriaatsini oqariaatsit, teoriit periutsillu atorsinnaanerai apersuusuisumillu isummersorfiginerai aamma

2) nammineerluni atuartitsinnermut naleqqiullugu teoriinik suliallu akuleriisissinnaanerai.

Imm. 3. Misilitsinneq angusiffigineqassaaq, pædagogikummimik ilinniartup minnerpaamik karakteri E (2) anguppagu.

§ 24. Soraarummeernermi naliliisut marluk ataatsimoorussamik karakteriliinissaq isumaqatigiissutigisinnaangikkunukku, soraarummeernermi naliliisut immikkoorlutik karakteriliissapput, inerniliussatullu karakteriliussaq tassaassaaq karakteriliussat taakkua marluk agguaqatigiissinnerai. Agguaqatigiissitsineq akunnaallisinneqassaaq akunnaalliliisitsinnermut malittarisassat nalinginnaasut malillugit, taamaattoq tak. imm. 2.

Imm. 2. Agguaqatigiissitsinerup E (2) ataappagu, misilitsinneq angusiffiussanngilaq.

§ 25. Pædagogikummimik ilinniartuq tamakkiisumik ilaannakortumilluunniit allap suliarisimasaanik nammineq suliamisut saqqummiisimanagera paasineqarpat imaluunniit tungavissalimmik pasinaruqarpat, soraarummeernermi naliliisup tamanna ilisimatusarfimmut nalunaarutigissavaa, pædagogikummimillu ilinniartumik soraarummeernermilu naliliisunik tusarniaareernikkut aalajangissallugu, suliaq Ilinniartitaanermut Naalackersuisoqarfimmut nalunaarutigineqassanersoq.

Imm. 2. Ilinniartitaanermut Naalackersuisoqarfik aalajangiissaaq misilitsinnermi akissut tunniunneqarsimasoq akuerinngitsoorneqassanersoq.

§ 26. Pædagogikummimik ilinniartuq napparsimanermik imaluunniit akuerisaasumik allamik peqquteqarluni misilitsinnermik naammassinissinnaasimanngippat imaluunniit pædagogikummimik ilinniartuq angusinngitsoorsimappat misilitsissutaaluunniit akuerisaanngitsoorsimappat, pædagogikummimik ilinniartuq ukiumi atuarfiusumi tullermi nutaamik misilitseqqinnissamut periarfissinneqassaaq.

Imm. 2. Pædagogikummimik ilinniartuq misilitsinnermi angusinissaminut pingasoriarluni misiliisinnaavoq.

Suliutigaluni pædagogikummimik ilinniarneq aamma nammineq ilinniartitsineq

§ 27. Suliutigaluni pædagogikummimik ilinniarneq nalinginnaasumik ingerlanneqartarpoq ilinniarnertuunngorniarfimmi pædagogikummimik ilinniartup atorfeqarfigisaani, ingerlanneqassallunilu pædagogikummimik ilinniartup ilitsersorneqarluni ilinniartitsineratut aamma ilitsersuisup klassini ingerlataani ilinniartitsinermik malinnaanikkut, kiisalu pædagogikummimik ilinniartup ilinniartitsissutini immikkoortunilu allani nammineq suliarisanngisamini ilinniartitsinermik malinnaaneratigut.

Imm. 2. Ilitsersuinerup imm. 1-imi taaneqartup ilaa inissinneqarsinnaavoq pædagogikummimik ilinniartup nammineq klassiinut.

Imm. 3. Sammisassat suliutigaluni pædagogikummimik ilinniarnermut namminerlu ilinniartitsinermut ilaasut, pædagogikummimik ilinniartup pædagogikummimik ilinniarnermi ilinniartitsissutigisaanut naligiikannersumik agguanneqassapput, tamatumunnga ilanngullugit sammisassat ilinniartitsissutinik allanik peqataatitsinermik ilaqartut.

§ 28. Pædagogikummimik ilinniartup suliutigaluni pædagogikummimik ilinniarnernut ilinniartitaanermut Naalakkersuisoqarfik nakkutilliisumik ataatsimik imaluunniit arlalinnik toqqaassaaq, pædagogikummimik ilinniartup ilinniartitsissutigisartagaasigut piginnaaneqartunik. Tamanna pisinnaangippat ilinniartitaanermut Naalakkersuisoqarfiup aammattaaq nakkutilleeqataasartussaq toqqarsinnaavaa, pikkorissartitsinermi aqutsisumut nakkutilliisumullu ikiuuttussaq.

Imm. 2. Ilinniarnertuunngorniarfiup pædagogikummimik ilinniartup suliffigisaata toqqassavai pædagogikummimik ilinniartup ilinniartitsissutigisartagaani pædagogikummimik ilitsersuisartussat aamma pikkorissartitsinermik aqutsisoq ilinniartitsinermik piginnaasaqartoq.

Imm. 3. Aammattaaq ilinniarnertuunngorniarfik immikkut ilitsersuinikkut kaammattuutaasumillu ilitsersuinikkut suliassanut ilitsersuisumik toqqaasinnaavoq.

§ 29. Nakkutilliisup suliassaraa pædagogikummimik ilinniartup ilinniarnernata ingerlanera tamaat nakkutigissallugu aammalu pædagogikummimik ilinniartumut ilitsersueqataassalluni, tamatumunnga makku ilanngullugit:

- 1) pædagogikummimik ilinniartup ilinniartitsineranik marloriarluni pulaarneratigut malinnaaneq,
- 2) pædagogikummimik ilinniartup suliap tungaatigut piginnaasaqarnerata pisariaqartutigut uppersaateqarnerata nakkutiginnissaa,
- 3) pulaarnermut siullermut atatillugu naliliineq ilitsersuinerlu,
- 4) pædagogikummimik ilinniartup suliutigaluni pædagogikummimik ilinniarnermi angusineranik naliliineq kiisalu
- 5) pikkorissartitsinermut aqutsisup missingiutaa tunngavigalugu pædagogikummimik ilinniarnermut oqaaseqaasiorneq.

Imm. 2. Imm. 1, nr. 4 naapertorlugu aalajangiinerit pulaarnerup kingulliup kingorna pikkorissartitsinermut aqutsisumik oqaloqateqarenikkut pissapput.

§ 30. Nakkutilliisoq isumaqaruni, pædagogikummimik ilinniartup ilinniarnernata ingerlanernut atatillugu annertuumik amigaateqartoqartoq, tassunga ilanngullugit pædagogikummimik ilinniartup ilinniakkatigut piginnaasaanut uppersaatinut attuumassuteqartut, nakkutilliisoq rektorimut saaffiginnessaaq, pissutsit iluarsineqaqqullugit Naalakkersuisoqarfillu tamanna pillugu ilisimatillugu.

Imm. 2. Nakkutilliisup amigaataasunut paasineqartunut naleqqiullugu aaqqiissutissanik naammaginatunik angusaqanngikkuni, nakkutilliisoq Ilinniartitaanermut Naalakkersuisoqarfimmut nalunaarutiginnissaaq, taassumalu aalajangissavaa iliuuserineqarsinnaasut suut aallartinneqassanersut.

§ 31. Pikkorissartitsinermi aqutsisup suliassarai:

- 1) pædagogikummimik ilinniartuq suleqatigalugu pædagogikummimik ilinniartup ilinniarnernata tamarmiusup pilersaarusiornissaa ataqatigiissarnissaalu,
- 2) pædagogikummimik ilinniartup pædagogikummimik ingerlatsinissaata pilersaarusiornera,
- 3) pædagogikummimik ilinniartup iliniartitsineranik malinnaaneq,
- 4) pædagogikummimik ilinniartup pædagogikummimik ilinniarnera pillugu oqaaseqaatissamut siunnersuuserneq qulakkeerlugu kiisalu
- 5) pædagogikummimik ilinniartup pædagogikummimik angusisinnaanera pillugu nakkutilliisumik oqaloqateqarneq.

§ 32. Pædagogikummimik ilinniarnermi ilitersuisup suliassarai

- 1) Pædagogikummimik ilinniartup suliat tungaasigut aamma pædagogiskimik ilitersornissaa, tamatumunnga ilanngullugu pædagogikummimik ilinniartup pædagogikummimi anguniakkanik angusaqarnissaanut peqataaneq,
- 2) ilinniartitsinerup pilersaarusiornernanut, ingerlanneranut nalilerneranullu atatillugu pædagogikummimik ilinniartumik ilitersuineq,
- 3) ilitersuisup aamma pædagogikummimik ilinniartup klassiini ilitersuisoqartillugu peqataaneq,
- 4) atuartitsinermut ilinniartup nammineerluni atuartitsineranut atatillugu pisariaqartitsineq naapertorlugu siunnersuineq,
- 5) nakkutilliisup pulaarnerani najuunneq aammalu tassunga atatillugu isumasioqatigiinnerni peqataaneq aamma
- 6) pikkorissaanermi pisortap pædagogikummimut ilinniartup pædagogikumnera pillugu oqaaseqaatissatut missingiusiorneranut siunnersuineq.

Kapitali 5

Ilinniartitsissummi ilinniartitsinissamut piginnaasat

§ 33. Ilinniartitsissummi ilinniartitsinissamut piginnaaneqalernissamut piunasaqaataavoq ilisimatusarfimmi imaluunniit qaffasinnerusumik ilinniarfimmi allami angusilluni kandidatitut soraarummeersimanissaaq, tassunga ilanngullugit ilinniarnertuunngorniarfinni atuarnermi ilinniartitsissummi ataatsimi imaluunniit arlalinni immikkut sammisaralugit ilinniakkat, taamaattoq tak. imm. 2 aamma § 35. Ilinniartitsissutit naligiissitat marluk tapertariissillugit ilinniarnermi ilinniartitsissutit tamarmik tassaassapput ilinniarnertuunngorniarfinni ilinniartitsissutigineqartartut. Aammattaaq piunasaqaataavoq ilinniartitaaneq immikkoortuni ataasiakkaani aammalu ataatsimoorluni ilinniakkat tungaasigut periutsitigulluunniit ima annertussuseqarlunilu itisileriffiussasoq, ilinniartitsisoq ilinniarnertuunngorniarluni ilinniakkami anguniakkanut naleqqiullugu suliap tungaatigut illersorneqarsinnaasumik ilinniartitsinissaassariaqarluni, tak. § 34.

Imm. 2. Ilinniartitsissummi ilinniartitsinissamut piginnaasat aammattaaq

pissarsiarineqarsinnaapput ilinniakkamik allamik ilinniagaqarnikkut, tamatuma kingorna suliamut piginnaasaqalersitsisumik inuussutissarsiummik suliaqarnermik malitseqarsimasinnaasumik.

Imm. 3. Ilinniartitsisut, ilinniartitsissutinik inuussutissarsiutinut sammisunik ilinniartitsisussat, inuussutissarsiummik misilittagaqartuussapput.

§ 34. Ilinniartitsissummi ilinniartitsinissamut piginnaatitsinermut naleqqiullugu rektorip nalilissavaa ilinniartitsisup ilinniakkatigut piumasaqaatit annikinnerpaaffissaat, tak. ilanngussaq 2, ilinniartitsissummi piumasaqaataasut, ilinniartitsisup naammassisimanerai, taamaattoq tak. imm. 2.

Imm. 2. Ilinniakkatigut piumasaqaatit annikinnerpaaffissaanni imarisaasut ilaat ataasiakkaat, rektorip aalajangiinerata kingorna imarisamikkut allanik taarserneqarsinnaapput, tamanna toqqaannartumik ilinniartitsissummut naapertuuppat.

Imm. 3. Ilinniakkatigut annikinnerpaaffissat qularnaassavaat, ilinniartitsisup ilinniagaa ilinniakkat tungaasigut periutsitigullu ima annertussuseqarlunilu itisileriffiutigisimasoq, pineqartoq ilinniakkat tungaasigut illersorneqarsinnaasumik ilinniartitsissummi ilinniarnertuunngorniarfinni ilinniartitsisusinnaalluni, tassunga ilanngullugit ilinniartitsisup

1) piginnaaneqarfiggissagai ilinniartitsissutip tunngaviusumik sammisaqarfii, tunngaviusumik teoriit suleriaatsillu, ilinniartitsissutip ilikkagassatut pilersaarutaani taakku saqqummernerai naapertorlugit,

2) ilinniartitsissutip ilinniagassartaanik tamakkiisumik qimerluuisinnaallunilu paasinnissimaneq,

3) ilinniartitsissutip atortorisaanik ilisimasaqarluarneq, tassunga ilanngullugu pædagogikumimik ilinniartup suliamut atatillugu IT-mik ullutsinnut naleqquttumik atuisinnaassuseqarnera,

4) suliamut tunngatillugu saqqummiinernik naliliisinnaaneq, tamatumunnga ilaatillugit ilinniarnermi atortussiat,

5) allattariarsorluni oqaluttariarsorlunilu saqqummiussinissaq siunertaralugu suliami apeqqutinik oqaasertaliisinnaaneq, suliarinnissinnaaneq allanullu sanilliussisinnaaneq nunanut tamalaanut aamma Kalaallit Nunaanut ataneqartillugit,

6) pisariaqartitsineq naapertorlugu aamma ilinniartitsissutip ineriartortinneqarnerata peqatigisaanik inuiaqatigiinnilu avatangiisigisani apeqqutinut atasumik suliami ilisimasassanik nutaanik ujarlersinnaaneq,

7) ilinniartitsissummi taaguusersuutinik allattariarsornikkut oqaluttariarsornikkullu ilisimasaqarneq aamma ilinniartitsissummi taaguusersuutit ilisimasalinnginneranni oqariaatsinik ilisimaqqaartariaqartunik kalaallisut oqaaseqarfiusumut naapertuuttunik pingaarutilinnik ilisimasaqarneq,

8) ilinniartitsissummi, ilinniartitsissutit naapertuuttut allat peqataatillugit, ilinniartitsisinnaaneq,

9) ilinniartitsissutini teknikkimut aamma pinngortitamik ilisimatusarnermut tunngasuni sullivinni aamma laboratoriani sillimaniarnerup tungaatigut isumannaalluinnartumik ilinniartitsisinnaaneq aamma ilinniartitsinermi misileraanerit, asiarluni pikkorissaanerit il.il. ingerlannissaannut suliamut atatillugu pædagogiskimillu tunuliaqutaqarnissaq aamma

10) ilinniarnertuunngorniarfimmi suliasanut tamarmiusunut atatillugu suliamik ilinniakkat atorlugit sulisinnaassuseqarneq.

Imm. 4. Ilinniartitsisup suliamut atatillugu piumasaqaatinik annikinnerpaanik naammassininneranik naliliinissamut atugassamik, naliliineq qularutigineqarpat, rektorip ilisimatusarfik naapertuuttoq qinnuigissavaa ilinniakkat allanut naleqqiullugit nalilersueqqullugu,

tamatumunnga ilanngullugu ilinniartitsisup ilinniakkamigut tunuliaqutai ECTS-pointinik qassinik annertussuseqarnersut.

§ 35. Teknikkimut teknologiimullu tunngasuni, attaveqaqatigiinnermi teknologii ilanngullugu, pinngortitamik ilisimatusarnermut aamma inuussutissarsiornikkut aningaasaqarnermut tunngasuni ilinniartitsisunut rektorip ilinniartitsissutini piginnaasaqarneq akuersissutigisinnaavaa, ilinniartitsissutini ilinniartitsisup annikinnerpaaffissat naammassisimappagit, tak. § 34 aamma ingeniørhøjskolimi, handelshøjskolimi imaluunniit ilisimatusarfimmi minnerpaamik ukiunik pingasunik affarmillu sivilisussulimmik ilinniakkamut tunngassuteqartumik annertusisamik ilinniaqqissimappat, ilinniagaq tamatuma malitsigisaanik minnerpaamik ukiuni marlunni naapertuuttumik inuutissarsiutitigut misilittagaqalernermik ilinniaqqinnermilluunniit ilaqartinneqarpat

§ 36. Rektorip qulakkiissavaa, pædagogikumimik ilinniartut Kalaallit Nunaata kulturianik, oqaluttuarisaaneramik aamma oqaasiinik suliaqarsimanngitsut, atorfinitsitaanerisa ukiuani siullermi pineqartunut tunngatillugu piginnaasaasa annertusarneqarnissaat.

Imm. 2. Piginnaasanik annertusaanermut ilaapput kulturi tunngavigalugu ilinniartitsineq, ilinniartut ataasiakkaat piginnaasaat aallaavigalugit ilinniartitsineq aamma oqaatsit ilinniartut ilitsoqussarinngisaat atorlugit ilinniartitsineq.

Kapitali 6

Pædagogikumimik ilinniarsimasat akuerisaanerat

§ 37. Rektorip qinnuteqaateqartoqareerneratigut akuerisinnavaa pædagogikumimik ilinniartup ilinniarsimasai taakkualuunniit ilai, siusinnerusukkut piginnaasarilersimasat tunuliaqutaralugit, taakku nassatarippassuk pædagogikumimik ilinniartup tamakkiisumik ilaannakortumilluunniit ilinniartitsinermik piginnaasaqalernissamut piumasaqaatinik naammassinninnera.

Imm. 2.

Ilinniartitsissummi ilinniartitseriaatsinik pikkorissarneq ilinniarsimasat akuerineqarsinnaanngilaq.

Imm. 3.

Ilisimatusarfiup, teoretiskimik pædagogikumimik ingerlatsisinnasutut, tak. § 18, akuerisaasup ilinniarsimasat teoretisk pædagogikumimut attuumassuteqartut akuersissutigisassavaa.

§ 38. § 37-mi, imm. 1 malillugu qinnuteqaat tunniunneqassaaq pædagogikumimik ilinniarnerp allartinneqannginnerani.

Imm. 2. Pædagogikumimik ilinniartup nammineq pisussaaffigaa ilinniarsimasat akuerineqarnissaannik qinnuteqarnermi uppersaatissat pisariaqartut pissarsiarinissaat.

§ 39. Rektorip § 37 malillugu allamik ilinniareersimasanik akuersineq Ilinniartitaanermut Naalakkersuisoqarfimmut nalunaarutigissavaa.

§ 40. Ilinniartitsinissamut piginnaaneqarnermut uppersaammi nalunaarutigineqassaaq pædagogikummimik ilinniartup ilinniareersimasat akuerisaanerit tunuliaqutaralugu pædagogikummi immikkoortui sorliit pisussaajunnaarsimanerai.

Kapitali 7

Ilinniartitsinissamut piginnaatitsissut aamma uppersaat

§ 41. Pædagogikummimik ilinniartup ilinniartitsissummi pædagogikummimi ilinniagaani ilinniartitsinissamut piginnaatitsissut rektorip tunniuttarpaa makkua piumasaqaatigalugit

- 1) pædagogikummimik ilinniartumut suliamik ingerlatsinissamut piginnaatitsissutip tunniunneqarsimanissaa, tak. § 11,
- 2) teoretisk pædagogikummimi misilitsinermi angusimanissaa, tak. § 20, aamma
- 3) nakkutilliisup aalajangereersimassagaa pædagogikummimik ilinniartup suliuqigaluni pædagogikummimik ilinniarnermi angusisimaneq, tak. § 29, imm. 1, nr. 4.

§ 42. Ilinniartitsisut, ilinniartitsissummi ataatsimi amerlanerluunniit Danmarkimi imaluunniit nunat avannarliit allat arlaanni ilinniartitsinissamut piginnaanilerneqarsimasut, assingusumik qaffasissusilimmik ilinniarnertuunngorniartinnit ilinniartitsinissamut piginnaanilerneqassapput.

§ 43. Ilinniartitsisoq ilinniartitsinissamut piginnaanngorsareersimasoq ilinniartitsissummi ataatsimi arlalinniluunniit piginnaanngorsaqqissimaneq ilinniartitsissummi ilassutaasumik ilinniartitseriaatsinik pikkorissarsimaneq tunuliaqutaralugit ilinniartitsissutini nutaani ilinniartitsinissamut piginnaaniligaasinnaavoq.

§ 44. Rektori pissutsini immikkorluinnaq ittuni, annerpaamik ukiut ataasiakkaarlugit, aammalu taamaallaat ilinniarnertuunngorniartinnit pineqartumut atuuttumik, ilinniartitsisumik ilinniartitsissummi ataatsimi imaluunniit amerlanerluunniit ilinniartitsinissamut piginnaatitsissutaagallartumik tunniussisinnavaoq, atorfik pillugu allagarsiinikkut allatulluunniit iliornikkut ilinniartitsinerup ilinniartitsisumit piginnaassusilikkamit isumagineqarnissaa periarfissarsissunneqarsimannippat.

Imm. 2. Ilinniartitsinissamut piginnaatitsissutaagallartoq taamaallaat marloriarluni tunniunneqarsinnaavoq, Ilinniartitaanermut Naalakkersuisoqarfiup, ilinniartitsisup pineqartup ilinniarnernut pilersaarussiaq tunngavigalugu, ilinniartitsinerup piginnaanilerneqarallarneqarnissaa akuerippagu.

Imm. 3. Ilinniartitsisut, ilinniartitsinissamut piginnaatitsissutaagallartumik tunineqarsimasut, sapinngisartik naapertorlugit ilinniartitsinerup piginnaatitsissummik tunniussinerup piumasaqaatit naammassiniassavaat.

§ 45. Ilinniartitsinermut piginnaatitsissummut tunniunneqartumut rektori uppernarsaasiussaaq. Uppernarsaat Ilinniartitaanermut Naalakkersuisoqarfimmit atsiorneqassaaq.

Imm. 2. Uppernarsaatip imarissavai:

- 1) Ilinniartitsinermut piginnaatitsissut iliniartitsissutinut sunut tunngasuunersoq.
- 2) Teoretisk pædagogikummimi misilitsinnermi karakteri aammalu ilinniareersimasat akuerisaajunnartut pillugit paasissutissat, tak. § 37.
- 3) Pædagogikummimit oqaaseqaat, tak. imm. 3, tassani allaaserineqassallutik pædagogikummimik ilinniartup pædagogikkimik nalinginnaasumik piginnaaneri, tassunga ilanngullugit makkunani piginnaasat:
 - a) ilinniartitsinerup pilersaarusionera, ingerlannera nalilernalu,
 - b) sulinerup aamma teoretiskimik pædagogikkikkut isumaliutiginninnerit imminnut atassusernissaat
 - c) nammineq, allat atuarfiullu atugassaanik ilinniartitsinerup inerisarnera eqqarsaatigeqqinneralu aamma
 - d) ilinniarnertuunngorniarfimmi ilinniartitsinermi suliassanilu allani suleqataasinnaaneq.

Imm. 3. Pædagogikummimi oqaaseqaat nalinginnaasumik suliarineqassaaq pædagogikummimik ilinniartitsissutinut ilinniartup ilinniagaanut tamanut atuuttumik. Taamaattoq suliami pissutsit immikkut ittut atuuppata, pædagogikummimik oqaaseqaat pædagogikummimik ilinniartup ilinniartitsissutinik ilinniagaani tamani immikkut suliarineqarsinnaavoq.

Kapitali 8

Naammagittaalliorneq

§ 46. Ilinniartitsisoq tunngavilersukkamik imminnullu tunngatillugu, inatsisitigut pissutsit nalunaarut manna malillugu aalajangiinernut attuumassuteqartut pillugit naammagittaalliuteqarsinnaavoq.

Imm. 2. Naammagittaalliuut Ilinniartitaanermut Naalakkersuisoqarfimmut qaatiguuliorneqassaaq ilinniarnertuunngorniarfimmullu tunniunneqassalluni.

Imm. 3. Naammagittaalliuut kingusinnerpaamik tunniunneqassaaq naammagittaalliortup naammagittaalliuutaasunik ilisimasaqalerneraniit sapaatip-akunnerisa marluk qaangiunneranni.

§ 47. Ilinniarnertuunngorniarfiup naammagittaalliortoq naammagittaalliuteqarnissamut ilitsersussavaa.

§ 48. Naammagittaalliummut pissutsit teoretisk pædagogikummimut tunngasut ilaappata, ilinniartitsisunngorlaat pikkorissartinneqartarnerat pinnagu, ilinniarnertuunngorniarfiup naammagittaalliuut pillugu ilisimatusarfimmit, teoretisk pædagogikummimik ingerlatsinissamut akuerisaasimasumit, oqaaseqaat piniassavaa, tak. § 18, imm. 1.

§ 49. Rektorip sapinngisamik piaarnerpaamik, tiguneraniillu kingusinnerpaamik ullut14-it qaangiuppata naammagittaalliuut suliamilu pappialat, nammineq suliamut nassuiaatini ilanngullugit, Ilinniartitaanermut Naalakkersuisoqarfimmut nassiuutissavaa.

Imm. 2. Rektorip nassuiaataa suliap qanoq aalajangiiffigineqarnissaanut inassuteqaammik imaqarsinnaavoq.

Imm. 3. Rektorip nassuiaataata suliarinissaata nassatarippagu peqataasunit avataaneersunit

naliliinernik piniarnissaq tamatumani ilanngullugu ilisimatusarfik teoretisk pædagogikummimik ingerlatsisimasoq, peqataasunit tusarniaasoqassaaq ima, naammagittaalliortoq nalinginnaasumik sapaatip-akunneranik ataatsimik piffissalerlugu, naliliinerit pissarsiarineqarsimasut oqaaseqarfiginissaannut periarfissinneqassalluni.

§ 50. Ilinniartitaanermut Naalakkersuisoqarfiup naammagittaalliuttip ilalerneqarnissaa imaluunniit tunuartinneqarnissaa aalajangiiffigissavaa.

Imm. 2. Naammagittaalliut ilalerneqarpat, Ilinniartitaanermut Naalakkersuisoqarfiup tamatuma qanoq kinguneqartinneqarnissaa aalajangiiffigissavaa.

Kapitali 9

Atuutilernissaanut aamma ikaarsaariarnermut malittarisassat

§ 51. Nalunaarut atuutilissaaq 1. oktober 2015-imi, ilinniartitsisunullu pædagogikummimik ilinniarnermik 1. august 2015-imi kingusinnerusukkulluunniit aallartitsisimasunut atuutissalluni.

Imm. 2. Taamaattorli ilinniartitsisut, pædagogikummimik ilinniarnerminnik 1. august 2015 sioqqullugu allartitsisimasut, ilinniarnertik ingerlatiinnarsinnaavaat ilinniarnernerlu taanna naammassillugu malittarisassat maannamut atuuttut malillugit, tamannalu tunngavigalugu ilinniartitsisinnaanermut piginnaatitsissummik tunineqarsinnaallutik.

Imm. 3. Ilinniartitsisut, siusinnerusukkut malittarisassat tunngavigalugit GUX-mi, hhx-imi aamma htx-imi ilinniartitsisinnaanerminnik akuerisaasimasut, ilinniarnertuunngorniarfimmi ilinniartitsisinnaajuassapput.

Imm. 4. Ilinniartitsisut, siusinnerusukkut ilinniartitsissutini ilinniartitsissutaasuni ilinniartitseriaatsinik pikkorissarsimanngitsut, nalunaarutip atuuttussanngortinneqarneraniit ukiunik marlunnik piffissalerlugit, ilinniartitsissutini ilinniartitseriaatsinik pisariaqartunik pikkorissarsimassapput, ilinniartitsisooqatigiinnut maani pineqartunut immikkut ittumik aaqqissuunneqarsinnaasumik.

Imm. 5. Ilinniartitaanermut Naalakkersuisoqarfik, ilinniartitsisunut pædagogikummimik ilinniarnermik nutaamik aallartitsisoqarnissamik ilimasullutik atorfininnerminnut atatillugu pædagogikummimik ilinnialersimanngitsunut, rektorimit tamanna pillugu qinnuteqarfigineqarnermigut pædagogikummimik ilinniarnermik immikkut eqikkakkamik ingerlatsinissamik akuersissuteqarsinnaavoq.

Namminersorlutik Oqartussat, ulloq 17. september 2015

Nivi Olsen

/

Mikael Kristensen